

Placi Antoni Cavegn, Sedrun

26.7.88



Sd. Danovamein havein nus stuiu seper-schuader, che buca nus savein decider sur dil cuoz da nossa veta e che las vias dil Segner ein nunperscrutablas. Venderdis, ils 20 da matg 1988, sederasa anetgamein la tresta nova ch'il Placi Antoni Cavegn seigi morts. Nuncapeivel e tuttina petra verdad. Tut consterni ston la buna mumma Victoria, ils fargliuns, parents ed ils avdonts dall'entira val prender enconuschiantscha da quei fatg tragic, che renda ins trests e pensivs.

Placi Antoni ei naschius ils 13 da fe-nadur 1941 a Sedrun. Ses geniturs Placi e Victoria Cavegn-Deragisch han giu 7 affons, duas buobas e tschun buobs, dils quals il Placi ei il quart. El ravugl da quella famiglia gauda el in'affonza suel-gliga. A Sedrun frequenta el las scolas primaras. Il bab miera gia igl onn 1949 ella vegliadetgna da mo 52 onns. Ils qui-taus e la responsabludad per ils affons minorens surpren la mumma plein resignazion e fidonza sil Segner. Cun care-zia materna e buca il davos cun siu bien exempla diregia ella la barca tras ils stempraus da lezs dis. Gie, ella ei vera-mein ina mumma cun in cor plein care-zia pils ses. Tut aparti quita ha ella per siu Placi Antoni.

Suenter il temps da scola serenda il giuvenot per entgin temps el cantun Lu-cerna e lavura sin in bein puril. Il schar encrescher mudregia el talmein, ch'el re-tuorna a casa tiels ses, nua ch'el resta en-tochen alla fin da sia veta terrestra.

A casa

Cun anim e plascher gida e segida el cun la mumma e cun ses fargliuns en casa e sil funs. El ei in um ruasseivel e spir buontad, in giuven survetscheivel pil concarstgaun ed adina cun bucca rienta. Duront in triep onns lavura el tier diffe-rentas interpresas da baghegiar e duront

biabein 22 onns eis el en survetsch da siu frar Richard sco pictur auxiliar. Das-pe-ras cultivescha el igl agen prau e tegn ina partiada nuorsas, per las qualas el ei in oreifer patrun.

Dapi ina partiada onns han ils biars dils fargliuns bandunau la casa paterna per fundar in'atgna famiglia e prender domicil en differents loghens, per part ella val e per part en outras regiuns da nossa patria. Il Placi Antoni ei restaus a casa cun la mumma e cun la sora Leni.

Las relaziuns en quella famiglia ein exemplaricas, propri in ambient da pasch e cuntentientscha. E lu, tuttenina il cumiau aschi anetg. Quel ei surportabels mo cun ina ferma cardientscha e fidonza dil Segner. – Placi Antoni lai anavos ina gronda largia en famiglia, mo era elllas casas vischinontas, gie ell'en-tira val. Il Segner vegli confortar ses cars suunter quellas grevas uras da cumiau.

La participaziun ordvart supren-denta e la baselgia da s. Vigeli fullanada il di da sepultura han documentau co ins appreziava e stimava il car defunct. Il chor mischedau da Sedrun pren cumiau da siu fideivel cantadur cun ina canzun impressiunonta e cun sbassar la bandiera sur sia fossa. Il Segner detti al car defunct il ruaus perpeten.